

崔公入藥鏡註解序

神仙之學豈凡夫俗子之可聞必是大根大器決烈  
丈夫明眼高士之可為也且夫學者為者何事外則  
窮天地施化之理內則明身心運用之機然雖如是  
宣尼若不遇老子親授故無猶龍之歎瞿曇不是古  
聖再來豈有出世之見所以學者如牛毛達者如麟  
角此無他在乎得傳與不得傳耳神仙之學不過脩  
鍊性命返本還源而已採先天一炁以為丹母運後  
天之氣以行火候以火鍊性則金神不壞以火鍊其  
命則道氣長存換盡陰濁之軀變成純陽之體神化  
自在應運無窮豈不奇哉余見其今之學仙者紛紛  
之多及至與其辨論真訣人各偏執一見不令其  
正傳之道觀其崔公入藥鏡八十二句言簡而意盡  
貫穿諸丹經之骨髓予不愧管窺之見遂將吾師所  
授口訣每四句下添一註脚割露玄機作人天眼目  
後之來者與我同志試留心玩誦斷斷有神告心悟  
之效無疑也或者有云吾註不足為信而崔公之言  
當以為實依而行之信而後之運鍊一身則學仙之  
能事畢矣脩江混然子序